

SEKSYEN 4

Inisiatif Strategik

55 STRATEGI BELANJAWAN 2023: MEMBANGUN NEGARA MADANI

Sisipan 1.1 – Membangun Negara MADANI:
Visi dan Kerangka Dasar Reformasi

58 KEMAMPANAN

59 KESEJAHTERAAN

61 DAYA CIPTA

61 HORMAT

62 KEYAKINAN

62 IHSAN

64 KESIMPULAN

65 RUJUKAN

SEKSYEN 4

Inisiatif Strategik

Strategi Belanjawan 2023: Membangun Negara MADANI

Menuju Malaysia MADANI, Kerajaan telah menggariskan anjakan besar yang perlu dilaksanakan melalui kerangka MADANI bagi membolehkan negara bangkit semula sebagai Harimau Asia. Di bawah kerangka ini, Kerajaan akan mengambil pendekatan yang komprehensif untuk menggalakkan perpaduan dalam kepelbagaian serta ketelusan dan tadbir urus yang baik dalam semua aspek pembangunan negara. Kerangka ini akan

memberikan tumpuan kepada pembinaan Malaysia sebagai sebuah negara berdaya tahan dan makmur berpandukan dasar yang berpandangan jauh untuk menggerakkan sumber manusia, teknologi dan sumber asli dengan cekap. Enam tonggak MADANI terdiri daripada keMampanan, kesejAhteraan, Daya cipta, hormAt, keyakiNan dan Ihsan. Kesemua tonggak ini akan memacu negara ke arah kestabilan, pemulihan ekonomi, kesejahteraan rakyat serta menegakkan integriti dalam masyarakat inklusif di bawah konsep *Wahdatul Fikr* (kesatuan fikiran) melalui sistem penyampaian perkhidmatan awam yang berkesan.

SISIPAN 1.1

Membangun Negara MADANI: Visi dan Kerangka Dasar Reformasi

Pengenalan


YAB Dato' Seri Anwar Ibrahim, Perdana Menteri Malaysia ke-10 telah melancarkan kerangka dasar MADANI, "Membangun Negara MADANI: Visi dan Kerangka Dasar Reformasi" pada 19 Januari 2023. Konsep MADANI digambarkan sebagai negara yang bertamadun dan maju dari aspek pemikiran, kerohanian dan infrastruktur. Kerangka dasar ini diterjemahkan dengan huruf M.A.D.A.N.I. iaitu keMampanan, kesejAhteraan, Daya cipta, hormAt, keyakiNan dan Ihsan. Gabungan enam tonggak utama tersebut membentuk kerangka dalam membangunkan negara yang mampan dan makmur bagi mencapai visi mewujudkan masyarakat Malaysia yang adil melalui penerapan aspek keterangkuman dan kesaksamaan.

Kerangka Dasar MADANI

Enam tonggak tersebut akan diterapkan dengan lapan elemen penting iaitu ekonomi dan kewangan; undang-undang; institusi; pendidikan; sosial; budaya; bandar; dan luar bandar untuk mengemudi negara mengharungi dimensi kerumitan, percanggahan dan kekacauan dalam tempoh pasca normal. Kerangka dasar MADANI akan memastikan keserentakan tindakan oleh semua pihak berkepentingan dalam semangat ketelusan dan kerjasama yang turut mengambil kira cabaran dan peluang masa hadapan. Hubung kait antara tonggak, elemen penting dan pelbagai dimensi seperti

dalam Rajah 1.1. Selain itu, bahasa, nilai dan budaya Malaysia merupakan nadi kerangka dasar ini yang mengiktiraf hak setiap warganegara dan menggalakkan norma sosial dan budaya untuk meningkatkan keterangkuman.

RAJAH 1.1. KERANGKA DASAR MADANI



Sumber: Institut Darul Ehsan dan The Centre for Postnormal Policy & Futures Studies

Tonggak Utama MADANI

Definisi, visi dan sasaran setiap tonggak utama ialah seperti berikut:

KeMampanan bertujuan memastikan kesinambungan sumber dalam memenuhi keperluan semasa tanpa menjejaskan keperluan generasi akan datang yang melibatkan proses berterusan dan usaha kolektif semua rakyat Malaysia untuk menghormati dan mengimbangi hak individu, masyarakat

serta alam semula jadi. Kemampunan merangkumi aspek persekitaran alam semula jadi, masyarakat luar bandar dan bandar serta keluarga dan individu. Selain itu, kemampunan dalam hal berkaitan kebudayaan serta tingkah laku sosial dan individu perlu disokong dan dipromosikan.

Kesejahteraan bertujuan menggalakkan pertumbuhan ekonomi yang seimbang dan mampan melalui pemerksaan dan keterangkuman masyarakat dengan mengambil kira kesejahteraan rakyat, masyarakat dan negara secara tuntas. Konsep Islam *al-falah* (kejayaan, kebahagiaan dan kesejahteraan) juga boleh dicapai melalui pengisian kerohanian dan peningkatan diri dalam mentaati perintah Allah. Konsep ini akan memberi keseimbangan bagi mencapai kesejahteraan berteraskan penghormatan kepada orang lain di samping mengaplikasikan inovasi secara berterusan dalam masyarakat.

Daya cipta merupakan kesediaan untuk memupuk budaya inovatif dalam kalangan masyarakat dan menjulang negara sebagai penyumbang aktif dalam revolusi digital dan teknologi. Daya cipta juga ialah proses berterusan dan perubahan yang memperkasakan kreativiti rakyat melalui penyediaan infrastruktur yang menyokong ekosistem inovasi. Budaya ini merupakan pemacu perubahan bagi meningkatkan daya saing negara secara terancang dan beretika di samping mengembangkan potensi dinamik masyarakat untuk membentuk masa hadapan yang lebih baik.

Hormat bertujuan membentuk masyarakat yang adil dan saling menghormati khususnya untuk keterangkuman, kesaksamaan, integriti dan maruah manusia. Tonggak ini akan menjadikan budi bahasa, kesopanan dan kesusilaan sebagai asas tingkah laku sivik dan ketamadunan. Hormat merupakan elemen asas dalam menyantuni orang lain dengan berhemah yang menekankan hak asasi manusia dan prinsip tidak mengharapkan balasan. Oleh itu, setiap anggota masyarakat perlu saling menghormati antara satu sama lain ke arah perpaduan rakyat yang lebih teguh.

Keyakinan merupakan komitmen dalam memartabatkan ketelusan dan mengembalikan keyakinan antara Kerajaan dengan rakyat sebagai usaha untuk membangunkan semula dan memperkukuh perpaduan nasional dalam kalangan masyarakat serta semua organisasi demi membina masa hadapan yang lebih baik. Konsep keyakinan boleh dilihat dari aspek kepercayaan dan pertanggungjawaban. Bagi memastikan negara terus maju ke hadapan, keyakinan hendaklah direalisasikan dan dibudayakan dalam kalangan masyarakat untuk mengatasi halangan dan rintangan sosioekonomi.

Ihsan akan memupuk masyarakat prihatin yang mendorong semua rakyat untuk menyokong kumpulan rentan mendapatkan keperluan asas melalui bantuan kebajikan sosial, makanan berzat seimbang dan perumahan mampu milik yang mencukupi serta penjagaan kesihatan yang berkualiti. Konsep ini menekankan tanggungjawab sosial yang lebih luas antara satu sama lain dengan sifat empati, kejujuran dan keinginan untuk memartabatkan status sosioekonomi semua lapisan masyarakat.

Dimensi Sokongan MADANI

Kesalinghubungan antara enam tonggak MADANI dengan lapan elemen penting hendaklah diterapkan dalam setiap dasar yang berkaitan bagi memastikan dasar negara terus teguh merentasi zaman. Usaha ini memerlukan analisis yang merangkumi antara lain, struktur, sistem dan idea sedia ada yang boleh disemak dan ditambah baik serta pelbagai hasil yang berpotensi dalam memastikan keberkesanan kerangka dasar ini. Namun demikian, pelaksanaan elemen penting tersebut perlu menangani cabaran dan peluang yang akan dihadapi dalam era baharu.

Setiap tonggak serta sebarang dasar berkaitan dan pelaksanaannya perlu sentiasa dipantau, dinilai dan disemak semula. Proses tersebut perlu dilaksanakan melalui penggunaan jentera kerajaan dan teknologi terkini. Bagi memastikan kejayaan pelaksanaan kerangka dasar tersebut, institusi berkaitan perlu diperkukuhkan manakala pihak berkepentingan perlu dilibatkan secara berterusan.

Kesimpulan

Kerangka dasar MADANI akan memperkasakan semua rakyat Malaysia yang terdiri daripada masyarakat majmuk serta mewujudkan platform yang inklusif dan saksama bagi mencapai matlamat pada masa hadapan. Kerangka dasar ini merupakan inisiatif bersepadu dan holistik iaitu kesemua enam tonggak saling berkaitan dalam tindakan berangkai yang menyokong kejayaan pelaksanaan dasar secara keseluruhan. Kesejahteraan negara akan dapat dicapai berlandaskan kemampuan, masyarakat Malaysia yang penyayang dan ihsan, budaya saling menghormati yang diterapkan semula berpandukan keyakinan sejati serta berbekalkan semangat daya cipta yang tinggi.

KeMampanan

Kemampanan kunci kesejahteraan masa hadapan

Tiga ancaman yang melanda dunia iaitu kesan perubahan iklim, penularan varian baharu COVID-19 yang sangat mudah berjangkit serta ketegangan geopolitik yang berterusan dijangka meningkatkan lagi inflasi global seterusnya berpotensi menggugat pertumbuhan ekonomi. Pengurusan sumber asli yang tidak cekap juga boleh memudaratkan generasi akan datang. Malaysia perlu mengukuhkan pelbagai aspek kemampuan dalam agenda pembangunan ekonomi untuk memastikan ekonomi negara terus berdaya tahan dalam menghadapi cabaran masa hadapan.

Gangguan pengeluaran makanan akibat cuaca ekstrem, peningkatan kos tenaga dan import serta pengehadan dalam pergerakan rentas sempadan dan akses bekalan makanan yang diimport akan mempunyai kesan meluas ke atas kehidupan dan perniagaan. Bagi menangani perkara ini, Kerajaan akan terus memberikan perhatian dan keutamaan khusus kepada keterjaminan makanan dalam memastikan kebolehcapaian makanan yang berterusan kepada rakyat. Usaha berterusan

sedang diambil untuk menambah baik keseluruhan rantai bekalan makanan termasuk faktor pengeluaran serta peringkat pemprosesan, pendedaran dan penyediaan dengan fokus memastikan keselamatan makanan.

Dasar Sekuriti Makanan Negara (2021 – 2025) menyediakan panduan menyeluruh kepada pihak berkuasa yang berkaitan dalam memastikan sumber makanan negara mencukupi untuk setiap rakyat. Antara inisiatif utama di bawah dasar ini termasuk mempergiat usaha untuk meningkatkan pengeluaran domestik, memperluas penerimgunaan teknologi dan seterusnya mengurangkan kebergantungan kepada import. Kerajaan juga komited untuk memodenkan lagi sektor pertanian bagi menjana pendapatan yang lebih tinggi untuk menarik lebih ramai belia menjadi usahawan tani. Inisiatif tersebut bertujuan untuk meminimumkan risiko terhadap keterjaminan makanan.

Melalui Belanjawan 2023, Kerajaan terus menyediakan subsidi dan insentif kepada industri pertanian dan perikanan serta melaksanakan pelbagai inisiatif bagi meningkatkan bekalan makanan hasil pertanian segar berteknologi tinggi untuk pengusaha agromakanan termasuk

menyediakan kemudahan agro-logistik. Selain itu, Kerajaan akan terus menggalakkan usahawan teknologi PMKS untuk meningkatkan pengeluaran tanaman dan pemprosesan makanan melalui penerimgunaan teknologi disokong oleh program pembiayaan dan pendanaan yang menarik.

Perubahan pola cuaca akan meningkatkan kekerapan bencana alam seperti banjir, kemarau berpanjangan, tanah runtuh dan fenomena air pasang besar yang boleh memberikan kesan meluas kepada negara dan kehidupan rakyat. Dalam hal ini, Kerajaan akan menjalankan lebih banyak usaha untuk menangani bencana tersebut bagi memastikan negara berdaya tahan terhadap peningkatan risiko disebabkan perubahan pola cuaca pada masa akan datang.

Dalam usaha mencapai status negara berpendapatan tinggi, Kerajaan akan meningkatkan usaha untuk mengurangkan kesan negara terhadap iklim selaras dengan aspirasi Malaysia untuk mencapai pelepasan gas rumah kaca (GHG) sifar bersih seawal 2050. Usaha tersebut termasuk mempertingkatkan penyerapan karbon semula jadi Malaysia serta menggalakkan penggunaan tenaga boleh baharu dan meningkatkan kecekapan tenaga merentasi semua sektor. Tambahan pula, Kerajaan akan menggalakkan ekosistem perakaunan karbon dalam kalangan semua pihak berkepentingan serta mengenal pasti mekanisme penetapan harga karbon yang bersesuaian. Pembangunan industri rendah karbon yang terpilih juga akan dipergiat termasuk terus mempromosi industri kenderaan elektrik dan ekosistem sokongannya.

Keperluan untuk memelihara alam semula jadi Malaysia adalah lebih mendesak terutamanya dalam memastikan kejayaan menangani semua isu tersebut. Keadaan hutan, tanah dan paya bakau yang baik membantu mengurangkan kesan dan kejadian bencana alam seperti banjir, tanah runtuh dan luruan ribut yang melampau. Pemuliharaan ekosistem laut

terutamanya bakau dan terumbu karang akan menyumbang kepada peningkatan stok ikan dan makanan laut serta mengurangkan risiko keterjaminan makanan. Peningkatan liputan pokok dan pemeliharaan hutan semula jadi akan mengukuhkan keupayaan penyerapan karbon semula jadi negara dan menyokong aspirasi pelepasan sifar bersih. Justeru, Belanjawan 2023 akan menyokong usaha bagi memastikan persekitaran semula jadi kekal terpelihara dan berdaya tahan sebagai satu bentuk penyelesaian semula jadi untuk mengurangkan isu berkaitan bencana dan keterjaminan makanan di samping mencapai aspirasi sifar bersih. Ekosistem semula jadi yang berkembang maju dengan kekayaan biodiversiti penting kepada semua rakyat Malaysia dan perlu dikekalkan untuk generasi akan datang.

Bagi mencapai tujuan tersebut, Kerajaan akan terus memperkukuh keupayaan dan kapasiti negara untuk mengoptimumkan sumber dalam mendepani cabaran yang dijangka di samping meningkatkan pembangunan dan pertumbuhan ekonomi secara mampan dan bertanggungjawab. Usaha tersebut memerlukan pendekatan seluruh negara demi mewujudkan pembangunan yang seimbang merentasi semua sektor serta meningkatkan kesejahteraan rakyat seterusnya menjamin masa hadapan yang lebih mampan.

Kesejahteraan

Pembangunan seimbang ke arah kesejahteraan

Kestabilan negara merupakan aspek penting dalam memastikan negara terus makmur pada masa hadapan. Keutamaan akan diberikan dalam memperkukuh kesejahteraan rakyat, perpaduan dan keselamatan negara di samping memastikan negara kekal teguh dan berdaya tahan melalui dasar fiskal mengembang, pewujudan lebih banyak peluang pekerjaan berkualiti, peningkatan produktiviti dan pengukuhan kesiagaan pertahanan negara.

Dalam memastikan kemakmuran Malaysia yang berterusan, kestabilan makroekonomi dan pelaksanaan agenda pembangunan negara secara berkesan memerlukan dasar fiskal yang komprehensif yang menumpukan kepada pencapaian matlamat yang ditetapkan dengan disokong oleh kecekapan hasil dan perbelanjaan serta pengurusan risiko yang berkesan. Pada masa yang sama, pelaksanaan dasar fiskal mengembang akan diteruskan dengan meluaskan asas hasil dan memulakan pembaharuan perbelanjaan awam di samping memastikan kemampuan hutang untuk merangsang aktiviti ekonomi. Di bawah Belanjawan 2023, Kerajaan akan meneruskan strategi hasil jangka sederhana bagi mengukuhkan MTF yang sedia ada. Strategi tersebut memberikan tumpuan kepada pencapaian kutipan hasil yang mampan untuk mempercepat konsolidasi fiskal. Selain itu, FRA akan meningkatkan ketelusan fiskal, akauntabiliti dan tadbir urus kewangan awam. Gabungan semua langkah tersebut akan mewujudkan ruang fiskal yang lebih baik bagi membolehkan Kerajaan melaksanakan langkah kitaran balas dan mengekalkan daya tahan ekonomi.

Selaras dengan perkembangan teknologi, peningkatan produktiviti akan terus diberikan keutamaan oleh Kerajaan melalui penyelidikan, pembangunan, pengkomersialan dan inovasi (R&D&C&I) di samping mempergiat automasi dan digitalisasi di bawah IR4.0 dan agenda MyDIGITAL bagi menarik lebih banyak pelaburan berkualiti. Sementara itu, strategi untuk menggalakkan aktiviti bernilai tambah tinggi dan digitalisasi dalam kalangan PMKS akan menjadi antara fokus Belanjawan 2023 bagi meningkatkan daya saing serta menambah baik ekosistem bekerja. Majikan khususnya dalam kalangan PMKS akan diberi galakan untuk meningkatkan penggunaan digital bagi meningkatkan produktiviti perniagaan. Selain itu, pembelajaran sepanjang hayat melalui inisiatif peningkatan kemahiran dan latihan semula yang disesuaikan mengikut keperluan juga akan diberikan penekanan dalam Belanjawan 2023 untuk memastikan lebih banyak peluang pekerjaan mahir dan bergaji tinggi termasuk kepada golongan belia.

Bagi meningkatkan pendapatan pekerja yang bergaji rendah, gaji minimum bagi pekerja telah disemak semula kepada RM1,500 sebulan berkuat kuasa 1 Mei 2022 di bawah Perintah Gaji Minimum 2022 dan telah memanfaatkan sekitar 27% daripada jumlah pekerja bergaji. Walau bagaimanapun, pelaksanaan dasar ini yang dijadualkan berkuat kuasa sepenuhnya pada 1 Januari 2023 telah ditangguhkan kepada 1 Julai 2023 bagi perusahaan mikro disebabkan oleh cabaran kewangan yang dihadapi khususnya syarikat yang mempunyai kurang daripada lima pekerja. Namun begitu, pelaksanaan dasar ini perlu dan penting untuk melindungi pekerja daripada menerima gaji yang terlalu rendah di samping dapat meningkatkan permintaan guna tenaga dan produktiviti setanding dengan ekonomi berpendapatan tinggi. Justeru, Kerajaan akan terus mengkaji kadar gaji minimum yang lebih wajar dan ditanda aras dengan paras gaji median semasa atau Pendapatan Garis Kemiskinan.

Keselamatan negara perlu diberi penekanan bagi mempertingkatkan lagi kesejahteraan rakyat. Landskap keselamatan semasa telah menjadi semakin kompleks dengan ancaman dalaman dan luaran yang mungkin boleh memberikan impak tinggi kepada keselamatan dan kedaulatan negara. Sehubungan itu, Belanjawan 2023 akan memberikan perhatian kepada keselamatan dan pertahanan negara dengan memperkukuh kawalan sempadan melalui penyelenggaraan aset dan menaik taraf fasiliti. Selain itu, ekosistem keselamatan siber dan kerjasama serantau berkaitan keselamatan akan diperkukuh bagi membantu menjamin kepentingan negara.

Daya Cipta

Membina budaya inovasi untuk meningkatkan daya saing

Dalam dunia yang dinamik, Malaysia perlu menyesuaikan diri dengan perubahan pantas persekitaran yang memerlukan anjakan paradigma dan budaya inovasi untuk meningkatkan daya saing. Sehubungan

ini, sistem penyampaian perkhidmatan memerlukan penambahbaikan berterusan agar lebih berkesan, bertanggungjawab dan telus. Ekosistem penyampaian perkhidmatan awam akan diperkemas melibatkan proses merekayasa, digitalisasi serta mengenal pasti pertindihan dan pertindihan fungsi. Usaha tersebut selari dengan inisiatif Kerajaan untuk mempromosikan Malaysia sebagai destinasi pelaburan strategik.

Bermatlambat menginstitusikan inovasi di Malaysia, kerjasama antara konglomerat dengan PMKS akan digalakkan bagi memperkukuh keseluruhan ekosistem ekonomi seterusnya meningkatkan daya saing industri negara pada peringkat global. Selain itu, keutamaan akan diberikan kepada langkah khusus bagi menggalak kerjasama dan menghubungkan PMKS dengan rangkaian pengetahuan serta penyelidikan dan pembangunan (R&D) termasuk syarikat multinasional (MNC), ahli akademik, institusi penyelidikan dan komuniti inovator. Usaha bagi meluaskan penggunaan e-pembayaran dalam komuniti dan menyediakan latihan mengenai digitalisasi perniagaan, automasi dan penggunaan kecerdasan buatan untuk PMKS juga akan diperkukuh. Inisiatif tersebut akan menggalakkan dan mendorong penerimgunaan proses yang inovatif dalam kalangan PMKS.

Selain itu, Belanjawan 2023 juga akan memberi fokus untuk meningkatkan akses kepada pembiayaan bagi mengukuhkan ekosistem inovasi melalui penambahbaikan kawal selia dan prosedur perniagaan. Langkah ini bertujuan membangunkan lebih banyak perniagaan tempatan dan menarik perniagaan global ke Malaysia. Di samping itu, pelbagai inisiatif akan dilaksanakan untuk menggalakkan perniagaan mengamalkan ESG dan memperbanyak pelaburan hijau bagi mengekalkan Malaysia sebagai destinasi pilihan pelaburan bernilai tinggi. Usaha ini akan mengukuhkan integrasi syarikat Malaysia dalam rantai bekalan global di samping menarik lebih banyak FDI dan pelaburan langsung domestik (DDI). Secara keseluruhan,

usaha tersebut akan mempercepat pewujudan syarikat pemula yang mempunyai pertumbuhan tinggi dan firma inovatif untuk memacu transformasi ekonomi Malaysia.

Sementara itu, pertumbuhan industri berimpak tinggi dan strategik akan dipercepat bagi menggalakkan penghasilan produk yang canggih, berteknologi dan bernilai tambah tinggi serta mewujudkan lebih banyak pekerjaan berpendapatan tinggi dan mengembangkan pasaran eksport. Dengan peralihan pantas industri tersebut, Kerajaan akan mempercepat penerimgunaan digitalisasi dan inovasi teknologi serta meningkatkan langkah keselamatan siber sejajar dengan pelancaran 5G sebagai pemacu pertumbuhan.

HormAt

Menggalakkan nilai hormat bagi perpaduan negara

Sebagai negara yang mempunyai masyarakat berbilang agama dan etnik, amalan saling menghormati sesama rakyat adalah penting untuk mengukuhkan perpaduan negara. Konsep *Karamah Insaniah* iaitu menghormati maruah manusia dan kehormatan individu merupakan kunci untuk menerapkan nilai hormat-menghormati dan toleransi dalam masyarakat. Usaha ini penting bagi menyatupadukan rakyat dalam menyumbang kepada kemakmuran negara. Inisiatif ini termasuk meningkatkan taraf hidup dan status sosioekonomi masyarakat tertentu khususnya yang tinggal di kawasan luar bandar dan golongan rentan bagi menggalakkan inklusiviti.

Pencapaian dan penyertaan ekuiti Bumiputera masih rendah dalam pelbagai aspek. Justeru, Belanjawan 2023 akan memberi tumpuan berterusan kepada usaha untuk meningkatkan penglibatan Bumiputera dalam pelbagai aktiviti sosioekonomi yang bernilai tambah tinggi dan mempunyai potensi pertumbuhan bagi melahirkan masyarakat Bumiputera yang lebih berdaya tahan dan mampan.

Isu ketidaksamarataan, jurang pendapatan dan pembangunan wilayah akan terus ditangani untuk mencapai pengagihan kekayaan yang lebih saksama dan pertumbuhan ekonomi yang seimbang di semua negeri. Inisiatif Belanjawan 2023 juga akan memberikan penekanan untuk menaik taraf infrastruktur dan merancakkan semula aktiviti ekonomi di luar bandar serta menambah baik kesalinghubungan antara luar bandar dengan bandar. Sumber yang mencukupi akan disediakan bagi memacu pembangunan sosioekonomi yang rancak di seluruh negara khususnya di Sabah dan Sarawak dengan mengambil kira keperluan dan keutamaan pembangunan negeri. Pelaksanaan projek atau program sedia ada juga akan dipercepat bagi menjana lebih banyak peluang pekerjaan dan meningkatkan prospek pendapatan di wilayah tersebut.

KeyakiNan

Mengembalikan keyakinan melalui ketelusan demi faedah bersama

Kerajaan memberikan keutamaan tertinggi kepada pengukuhan ekosistem tadbir urus pada semua peringkat bagi meningkatkan keyakinan rakyat kepada institusi kerajaan. Seterusnya, usaha akan diambil untuk memperkukuh tadbir urus bagi meningkatkan ketelusan, integriti, kecekapan dan akauntabiliti terutamanya dalam perolehan kerajaan, tata kelola syarikat berkaitan kerajaan (GLC) dan institusi Parlimen.

Elemen demokrasi dan tadbir urus pada peringkat institusi akan dipertingkatkan dengan menginstitusikan proses rundingan awam, hebahan saluran komunikasi dan pelaksanaan audit kualiti. Usaha tersebut akan memastikan semua kementerian, institusi kerajaan, perniagaan dan korporat peka dengan kewujudan dasar sedia ada dan baharu serta komited untuk menyokong pelaksanaannya.

Sementara itu, fokus yang diberi keutamaan adalah kepada pengukuhan institusi dan perundangan berkaitan termasuk sistem Parlimen serta pengemaskinian perundangan, kerangka undang-undang, dasar dan prosedur selaras dengan perkembangan semasa. Inisiatif tersebut juga akan dilaksanakan dalam perolehan kerajaan dan syarikat milik kerajaan (SOE) untuk meminimumkan pendedahan risiko kepada Kerajaan.

Ihsan

Meningkatkan modal sosial untuk taraf hidup yang lebih baik

Negara akan berjaya dalam setiap aspek pembangunan terutamanya dari segi ekonomi, kemampanan dan inklusiviti jika semua usaha dilaksanakan dengan ihsan. Perhatian akan diberikan untuk mengurangkan beban kewangan golongan rentan termasuk golongan miskin, orang kurang upaya (OKU) dan warga emas bagi memastikan taraf hidup terus dipertingkatkan. Usaha tersebut termasuk meningkatkan bilangan serta memudah cara pemilikan rumah mampu milik, menambah baik akses kepada pendidikan dan perkhidmatan penjagaan kesihatan yang berkualiti serta melaksanakan program untuk meningkatkan pendapatan isi rumah.

Kerajaan mengiktiraf peranan penting Sektor Ketiga sebagai rakan pembangunan dalam mendekati komuniti tertentu. Kerajaan akan terus memperkasakan pertubuhan bukan kerajaan (NGO), pertubuhan masyarakat sivil (CSO) dan ekosistem sukarelawan untuk mengambil bahagian dalam menyokong agenda kemanusiaan dan kelestarian Kerajaan dalam usaha meluaskan keprihatinan dan belas ihsan kepada rakyat. Walau bagaimanapun, pihak tersebut perlu menunjukkan struktur tadbir urus yang baik di samping melaksanakan program khusus yang berkesan bagi memastikan koordinasi yang teratur demi pembangunan negara.

Perkembangan ekonomi global semasa telah menyebabkan peningkatan kos keperluan asas seperti makanan, pengangkutan dan perumahan. Pada masa yang sama, pendapatan yang tidak mencukupi dan simpanan yang rendah merupakan antara isu utama yang dihadapi oleh kebanyakan isi rumah. Oleh yang demikian, Kerajaan akan terus mempertingkatkan dan memperkemas sistem penyampaian dan liputan perlindungan sosial agar lebih cekap dan berkesan bagi melindungi rakyat daripada kejutan pada masa hadapan. Bagi mencapai matlamat tersebut, peranan Majlis Perlindungan Sosial Malaysia (MySPC) dalam menyelaras jaringan keselamatan dan perlindungan sosial untuk kumpulan sasaran akan diperkukuh.

Kerajaan komited untuk terus melaksanakan program bantuan sosial dan memastikan sasaran yang ditetapkan dicapai dengan efektif. Dalam hal ini, usaha untuk menambah baik sistem sedia ada perlu dilaksanakan secara teratur bagi memastikan pengagihan yang sistematik, mengelakkan pertindihan dan meningkatkan akauntabiliti dalam kalangan pihak berkepentingan yang berkaitan. Pelaksanaan langkah tersebut akan meningkatkan kecekapan sistem penyampaian bantuan sosial.

Dari perspektif pekerjaan, liputan perlindungan sosial yang menyeluruh akan menyediakan jaringan keselamatan jangka masa panjang yang mencukupi kepada pekerja termasuk golongan yang bekerja sendiri dan pekerja dalam sektor tidak formal. Walau bagaimanapun, hanya 14% daripada 2.8 juta golongan yang bekerja sendiri mencarum secara sukarela di bawah Akta Keselamatan Sosial Pekerja Sendiri 2017 [Akta 789] sehingga Oktober 2022. Oleh itu, usaha akan dipergiat untuk mengkaji kemungkinan mewajibkan caruman oleh golongan yang bekerja sendiri supaya mendapat perlindungan sosial sewajarnya daripada ketidaktentuan pada masa hadapan.

Kerajaan akan terus menyediakan sumber mencukupi bagi memastikan akses yang saksama kepada penjagaan kesihatan serta pendidikan dan latihan kemahiran yang berkualiti pada semua peringkat dengan kos berpatutan. Usaha ini selaras dengan Matlamat Pembangunan Mampan (SDG) iaitu menyediakan akses sejagat terhadap sistem penjagaan kesihatan dan pendidikan berkualiti tanpa mengira kumpulan pendapatan isi rumah, wilayah dan etnik.

Infrastruktur dan kemudahan sekolah yang mencukupi, selamat serta sensitif gender dan OKU akan dibina atau dinaik taraf bagi memastikan pencapaian pendidikan sejagat khususnya bagi pendidikan prasekolah dan menengah. Bagi membangunkan bakat tersedia masa hadapan serta memastikan semua pelajar memperoleh pengetahuan dan kemahiran yang diperlukan untuk alam pekerjaan, sistem penyampaian pengajaran dan pembelajaran akan diperkemas untuk meningkatkan outcome pembelajaran.

Sistem penyampaian penjagaan kesihatan akan ditambah baik untuk menyediakan akses sejagat kepada penjagaan kesihatan berkualiti terutamanya kepada golongan miskin dan memerlukan. Sehubungan itu, Kerajaan akan memastikan hospital dan klinik dilengkapi dengan personel penjagaan kesihatan yang mencukupi, peralatan dan infrastruktur yang canggih untuk meningkatkan lagi kualiti perkhidmatan serta menyediakan persekitaran yang kondusif di pusat penjagaan kesihatan. Inisiatif pengesanan awal untuk mengukuhkan kesiapsiagaan sistem penjagaan kesihatan serta tindak balas terhadap penularan penyakit berjangkit akan diteruskan melalui program saringan kesihatan yang berkesan. Bagi memupuk gaya hidup sihat, aktif dan penyayang dalam kalangan masyarakat pula program kesedaran mengenai kepentingan kesihatan mental akan diperkenalkan untuk menambah baik kualiti hidup rakyat Malaysia.

Kesimpulan

Bagi memastikan Malaysia terus makmur dan berdaya tahan berteraskan konsep MADANI, penekanan akan diberikan untuk memperkukuh pelaksanaan peraturan dan tadbir urus yang baik pada semua peringkat. Dasar, strategi dan program untuk pembangunan sosioekonomi negara akan memberikan tumpuan bagi memperkukuh kemampuan, kesejahteraan,

daya cipta, keyakinan, nilai hormat dan ihsan. Melangkah ke hadapan, Kerajaan akan mengambil pendekatan yang lebih holistik dan inklusif untuk membangunkan dan memajukan Malaysia dengan memberikan penekanan kepada kepentingan menyepadukan komponen insaniah dengan pembangunan ekonomi bagi memastikan ekonomi yang lebih menitikberatkan aspek kemanusiaan selaras dengan konsep *Karamah Insaniah*.

Rujukan

- Ibrahim, A. (2022). *Membangun negara MADANI: Visi dan kerangka dasar reformasi*.
- Jabatan Peguam Negara. (2022). *Perintah Gaji Minimum 2022. P.U. (A) 140*.
- Jabatan Peguam Negara. (2017). *Akta Keselamatan Sosial Pekerja Sendiri 2017 [Akta 789]*.
- Jabatan Perangkaan Malaysia. (2022a). *Laporan survei gaji & upah 2021*.
- Jabatan Perangkaan Malaysia. (2022b). *Laporan survei tenaga buruh 2021*.
- Kementerian Pertanian dan Keterjaminan Makanan. (2020). *Dasar Sekuriti Makanan Negara (2021 –2025)*.
- Pertubuhan Keselamatan Sosial. (2023). *Weekly report: Week 5, 2023*. <https://eiscentre.perkeso.gov.my/weekly-report/EIS-REPORT.pdf>
- Unit Perancang Ekonomi, Jabatan Perdana Menteri. (2021). *Rancangan Malaysia Kedua Belas, 2021-2025: Malaysia makmur, inklusif dan mampan*. <https://rmke12.epu.gov.my/bm>

